

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков.

Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеву со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи воззвах

Глас 1. Господи, воззвах к Тебе, услыши мя.

Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, вегда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.

Воскресны стихиры

Стих: Изведи из темницы душу мою, исповедатися имени Твоему.

Вечерняя наша молитвы приими, Святыи Господи, и подаждь нам оставление грехов, яко Един еси явлей в мире Воскресение.

Стих: Мене ждут праведницы, дондеже воздаси мне.

Обыдите людие Сион, и обымите Его, и дадите славу в нем Воскресшему из мертвых: яко Той есть Бог наш, Избавлей нас от беззаконий наших.

Стих: Из глубины воззвах к Тебе Господи, Господи, услыши глас мой.

Приидите людие, воспоим, и поклонимся Христу, славяще Его из мертвых Воскресение: яко Той есть Бог наш, от прелести вражия мир Избавлей.

Стих: Да будут уши Твои, внимлюще гласу моления моего.

Веселитесь Небеса, вострубите основания земли, возопийте горы веселие: се бо Еммануил грехи наша на Кресте пригвозди, и живот даяй, смерть умертви, Адама Воскресивый, яко Человеколюбец.

Стих: Аще беззакония назриши Господи, Господи, кто постоит Яко у Тебе очищение есть.

Плотию волею Распеншагося нас ради, Пострадавшая и Погребенна, и Воскресша из мертвых, воспоем глаголюще: утверди православием Церковь Твою, Христе, и умири жизнь нашу, яко Благ и Человеколюбец.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Живоприемному Твоему гробу предстояще, недостойнии, славословие приносим неизреченному Твоему благоутробию, Христе Боже наш: яко Крест и смерть приял еси, Безгрешне, да мирови даруеши Воскресение, яко Человеколюбец.

Ины стихиры преподобной, глас 6

Стих: От стражи утренния до ноши, от стражи утренния, да уповает Израиль на Господа.

Тебе убо възбраняше честных взирания, скверн прежде привлеченное сквернение: твое же чувство, и твоя Богомудрая содеянных совесть, к лучшим тебе обращение содеяша. На икону бо воззревши благословенныя Богоотроковицы, всех покаявшися прегрешений своих всехвальная прежних, в дерзновении Честному Древу поклонилася еси.

Стих: Яко у Господа милость, и многое у Него избавление, и Той избавит Израиля от всех беззаконий его.

Тебе убо възбраняше честных взирания, скверн прежде привлеченное сквернение: твое же чувство, и твоя Богомудрая содеянных совесть, к лучшим тебе обращение содеяша. На икону бо воззревши благословенныя Богоотроковицы, всех покаявшися прегрешений своих всехвальная прежних, в дерзновении Честному Древу поклонилася еси.

Стих: Хвалите Господа вси языцы, похвалите Его вси людие.

Местом поклонившися радостно святым, добродетели напутное спасительнейшее, оттуду прияла еси, и зело потекла еси доброе шествие: и струю прешедши иорданскую, в жилище Предтечево усердно вселилася еси, и страстей свирепство жительством омрачила еси, истончаваючи в дерзновении, приснопамятная Мати, плотская свойства.

Стих: Яко утвердися милость Его на нас, и истина Господня пребывает во век.

В пустыню вселившись твоих страстей образы от души отъяла еси, боговиднейшее изображение в души написавши, добродетелей виды: и толико просияла еси, яко и водами легко преходити блаженная, и от земли взиматися в твоих к Богу молениих: и ныне в дерзновении всеславная Марие Христу предстоящи, молися о душах наших.

Слава, глас 4

Очудотвори Христе Креста Твоего сила, яко и яже прежде блудница, постническим подвигом подвизася: отнюдуже и немощное отвергши, доблественно сопротивоста на диавола. Темже и почеть победы носящи, молится о душах наших.

И ныне, глас 1, Догматик:

Всемирную славу, от человек Прозябшую, и Владыку Рождшую, Небесную Дверь, воспоем Марию Деву, Безплотных песнь, и верных удобрение: Сия бо явися Небо, и Храм Божества: Сия преграждение вражды разрушивши, мир введе, и Царствие отверзе. Сию убо имуще веры Утверждение, Поборника имама из Нея Рождшагося Господа. Дерзайте убо, дерзайте людие Божии: ибо Той победит враги, яко Всесилен.

Вечерний вход

Премудрость. Прости.

Свете тихий святых славы, Безсмертного, Отца Небесного, Святого Блаженного, Иисусе Христе! Пришедше на запад солнца, видевше свет вечерний, поем Отца, Сына и Святого Духа, Бога. Достоин еси во вся времена пет быти гласы преподобными, Сыне Божий, живот даяй, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, Господь воцарися, в лепоту облечеса.

Стих: Облечеса Господь в силу и препоясаса.

Стих: Ибо утверди вселенную, яже не подвижится.

Стих: Дому Твоему подобае святыня, Господи, в долготу дний.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобае хвала. Тебе подобае пение, Тебе слава подобае, Отцу и Сыну и Святому Духу, ныне и присно и во веки веков. Аминь.

Просительная ектения.

Исполним вечернюю молитву нашу Господеви...

На стиховне стихиры воскресные, глас 1-й:

Страстию Твоею, Христе, от страстей свободихомся, и воскресением Твоим из истления избавихомся, Господи, слава Тебе.

Стих: Господь воцарися, в лепоту облечеса.

Да радуется тварь, небеса да веселятся, руками да восплещут языцы с веселием: Христос бо Спас наш, на Кресте пригвозди грехи наша: и смерть умертвив, живот нам дарова, падшаго Адама всеродного Воскресивый, яко Человеколюбец.

Стих: Ибо утверди вселенную, яже не подвижется.

Царь сый небесе и земли непостижимо, волею распялся еси за человеколюбие. Егоже ад срет доле, огорчися, и праведных души приемша, возрадовашася: Адам же, видев Тя, Зиждителя в преисподних, воскресе. О чудесе! Како смерти вкуси всех жизнь; но якоже восхоте мир просветити зовущий и глаголющий: Воскресый из мертвых, Господи, слава Тебе.

Стих: Дому Твоему подобае святыня, Господи, в долготу дний.

Жены мироносицы, мира носяща, со тщанием и рыданием гроба Твоего достигоша, и не обретша Пречистаго Тела Твоего, от Ангела же уведевша новое и преславное чудо, Апостолом глаголаху: воскресе Господь, подавая миру велию милость.

Слава, преподобной, глас 2

Душевная ловления, и страсти плотския мечем воздержания посекала еси: помысла прегрешения молчанием обучения подавила еси, и струями слез твоих пустыню всю напоила еси, и прозябла еси нам покаяния плоды. Темже твою память преподобная празднуем.

И ныне, глас 2 Богородичен:

О чудесе новаго всех древних чудес! Кто бо позна мать без мужа рождшую, и на руку носящую, всю тварь Содержащаго Божие есть изволение Рождаеся. Егоже, яко Младенца, Пречистая, Твоима рукама носившая, и Матернее дерз-

новение к Нему имущая, не престай молящи о чтущих Тя, ущедрити и спасти души наша.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святой Боже, Святой Крепкий, Святой Безсмертный, помилуй нас (трижды).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святой, посети и исцели немощи наша, имене Твоего ради. Господи, помилуй (трижды).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Отпустительный тропарь:

Богородице, Дево, радуйся, Благодатная Марие, Господь с Тобою; благословенна Ты в женах и благословен Плод чрева Твоего, яко Спаса родила еси душ наших (трижды).

Буди имя Господне благословенно от ныне и до века (трижды)..

33-й псалом

Благословлю Господа на всякое время, выну хвала Его во устех моих.

О Господе похвалится душа моя: да услышат кротцыи и возвеселятся.

Возвеличите Господа со мною, и вознесем имя Его вкупе.

Взысках Господа, и услыша мя, и от всех скорбей моих избави мя.

Приступите к Нему, и просветитесь, и лица ваша не постыдятся.

Сей нищий воззва, и Господь услышай, и от всех скорбей Его спасе и.

Ополчится Ангел Господень окрест боящихся Его, и избавит их.

Вкусите и видите, яко благ Господь: блажен муж, иже уповае на Нань.

Бойтесь Господа вси святии Его, яко несть лишения боящимся Его.

Богатии обнищаша и взалкаша: взыскающии же Господа не лишатся всякаго блага.

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

Слава в вышних Богу, и на земли мир, в человецех благоволение (трижды).

Господи! устне мои отверзеши, и уста моя возвестят хвалу Твою (дважды).

Шестопсалмие.

Псалом 3-й

Господи, что ся умножиша стужающии ми! мнози встают на мя; ...

Псалом 37-й

Господи! да не яростию Твоею обличиши мене, ниже гневом Твоим накажеш мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в нощи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забывай всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Великая ектения

Миром Господу помолимся...

Бог Господь

Бог Господь и явился нам, благословен Грядый во имя Господне.

Стих: Исповедайтесь Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь воскресный, глас 1

Камени запечатану от иудей и воином стрегущим Пречистое Тело Твое, воскресл еси тридневный, Спасе, даруяй миру жизнь. Сего ради Силы Небесныя вопияху Ти, Жизнодавче: слава Воскресению Твоему, Христе, слава Царствию Твоему, слава смотрению Твоему, едине Человеколюбче (дважды).

Слава, преподобной глас 8

В тебе Мати известно спасеся еже по образу: приимши бо Крест, последовала еси Христу и деючи учила еси: презирати убо плоть, преходит бо, прилежати же о души вещи бессмертней. Темже и со ангелы срадуется, преподобная Марие, дух твой.

И ныне, глас 8, Богородичен:

Иже нас ради рождейся от Девы и распятие претерпев, Благий, испровергий смертию смерть, и воскресение явлей, яко Бог, не презри, яже создал еси рукою Твоею; яви человеколюбие Твое, Милостиве, приими рождшую Тя Богородицу, молящуюся за ны, и спаси, Спасе наш, люди отчаянныя.

Чтение кафизм

Господи помилуй 3р., Слава,
И ныне... читает кафизму в 3 Славы

Малая ектения,

Паки и паки миром Господу помолимся...

По 1-м стихословии, седальны воскресны, глас 1:

Гроб Твой, Спасе, воины стрегущии, мертвии от облистания явльшагося ангела быша, проповедающа женам воскресение. Тебе славим тли потребителя, Тебе припадаем, Воскресшему из гроба, и Единому Богу нашему.

Стих: Воскресни Господи Боже мой, да вознесется рука Твоя, не забуди убогих Твоих до конца.

Ко Кресту пригвождься волею, Щедре, во гробе положен быв яко мертв, Живоодавче, державу стерл еси, Сильне, смертию Твоею: Тебе бо вострепеташа вратницы адовы, Ты совоздвигл еси от века умершья, яко Един Человеколюбец.

Слава, и ныне, Богородичен:

Матерь Тя Божию свемы вси Деву воистинну, и по Рождестве явльшуюся, иже любовию прибегающии к Твоей благости: Тебе бо имамы грешнии предстательство, Тебе стяжахом в напастех Спасение, Едину Всенепорочную.

Господи помилуй 3р., Слава, И ныне... читает кафизму в 3 Славы

Малая ектения,

Паки и паки миром Господу помолимся...

По 2-м стихословии седальны воскресны, глас 1

Жены ко гробу приидоша уранша, и ангельское явление видеvша, трепетаху: гроб облиста жизнь, чудо удивляше я: сего ради шедша, учеником проповедаху востание: ад плени Христос, яко Един крепок и силен, и истлевшыя вся совоздвиге, осуждения страх разрушив Крестом.

Стих: Исповемся Тебе Господи всем сердцем моим, повем вся чудеса Твоя.

На Кресте пригвоздился еси, Животе всех, и в мертвых вменился еси, Безсмертный Господи, воскресл еси тридневен, Спасе, совоздвиг Адама от тления. Сего ради силы небесныя вопияху Тебе, Жизнодавче Христе: слава Воскресению Твоему, слава низхождению Твоему, Едине Человеколюбче.

Слава, и ныне, Богородичен:

Марие, честное Владыки Приятелище, воскреси ны падшыя в пропасть лютаго отчаяния, и прегрешений и скорбей, Ты бо еси грешным Спасение и помощь, и крепкое Предстательство, и спасаеши рабы Твоя.

Полиелей

Хвалите имя Господне, хвалите раби Господа. Аллилуиа (трижды).

Благословен Господь от Сиона, живой во Иерусалиме. Аллилуиа (трижды).

Исповедайтесь Господеви, яко благ, яко в век милость Его. Аллилуиа (трижды).

Исповедайтесь Богу небесному, яко в век милость Его. Аллилуиа (трижды).

Воскресные тропари святого Иоанна Дамаскина:

Благословен еси, Господи, научи мя оправданием Твоим

Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.

Благословен еси, Господи, научи мя оправданием Твоим

Почто мира с милостивными слезами, о ученицы, растворяете Блистайся во гробе Ангел мироносицам вещаше: видите вы гроб и уразумейте: Спас бо воскресе от гроба.

Благословен еси, Господи, научи мя оправданием Твоим

Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцыте.

Благословен еси, Господи, научи мя оправданием Твоим

Мироносицы жены с миры пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскресе от гроба.

Слава Отцу и Сыну и Святому Духу.

Поклонимся Отцу и Его Сынови, и Святому Духу, Святей Троице во едином существе, с Серафимы зовуще: Свят, Свят, Свят еси, Господи.

И ныне и присно и во веки веков, аминь.

Жизнодавца рождши, греха, Дево, Адама избавила еси, радость же Еве в печали место подала еси, падшыя же от жизни к сей направи из Тебе воплотивыися Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Малая ектения

Паки и паки миром Господу помолимся...

Ипакои, глас 1

Разбойничю покаяние рай окраде, плачь же мироносиц радость возвести, яко воскресл еси, Христе Боже, подай миру велию милость.

Малая ектения

Паки и паки миром Господу помолимся.

Степенна, глас 1

Антифон 1

Внегда скорбети ми, услыши моя болезни, Господи, Тебе зову.

Пустынным непрестанное Божественное желание бывает, мира сущим суетнаго кроме.

Слава: Святому Духу честь и слава, якоже Отцу подобает, купно же и Сыну, сего ради да поем Троице Единодержавие.

И ныне, тойже.

Антифон 2:

На горы Твоих вознесл еси мя законов, добродетельми просвети, Боже, да пою Тя.

Десною Твоею рукою приим Ты, Слове, сохрани мя, соблюди, да не огонь мене опалит греховный.

Слава: Святым Духом всякая тварь обновляется, паки текущи на первое: равномощен бо есть Отцу и Слову.

И ныне, тойже.

Антифон 3:

О рекших мне, внидем во дворы Господни, возвеселися мой дух, срадуется сердце.

В дому Давидове страх велик: тамо бо престолом поставленным, судятся вся племена земная, и языцы.

Слава: Святому Духу, честь, поклонение, славу и державу, якоже Отцу достоин, и Сынови подобает приносить: Единица бо есть Троица Естеством, но не Лицы

И ныне, тойже.

Прокимен, глас 1: Ныне воскресну, глаголет Господь, положуся во Спасение, не обинюся о нем.

Стих: Слова Господня, слова чиста..

Господу помолимся — Господи помилуй— Яко Свят еси Боже наш... Аминь.

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — Господи помилуй
Зр

Мир всем - И духови твоему.

От (Матфея или Марка или...) Святаго Евангелия чтение Слава Тебе, Господи, слава Тебе.

Чтение Евангелия.

Слава Тебе, Господи, слава Тебе.

Воскресение Христово видевше, поклонимся Святому Господу Иисусу, единому безгрешному. Кресту Твоему покланяемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертью смерть разруши.

50 псалом (чтец)

Слава Отцу и Сыну и Святому Духу. Покаяния отверзи ми двери жизнедавче, утренюет бо дух мой ко храму святому твоему, храм носяй телесный весь осквернен: но яко щедр, очисти благоутробною твоею милостию

И ныне и присно и во веки веков, аминь. На спасения стези настави мя Богородице, студными бо окалях душу грехми, и в лености все житие мое иждих: но твоими молитвами избави мя от всякия нечистоты.

Помилуй мя, Боже, по велицей милости Твоей и по множеству щедрот Твоих очисти беззаконие мое!

Множества содеянных мною лютых, помышляя окаянный, трепещу страшнаго дне суднаго: но надеяся на милость благоутробия твоего, яко давид вопию ти: помилуй мя Боже по велицей твоей милости.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатая; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единороднаго Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — Аминь.

Канон воскресный. Глас 1
Песнь 1

Ирмос: Твоя победительная десница Боголепно в крепости прославися: та бо, Безсмертне, яко всемогущая, противныя сотре, Израильтяном путь глубины новосоделавшая.

Иже рукама пречистыма от персти богодетельне исперва создав мя, руке распростерл еси на кресте, от земли взывая тленное мое тело, еже от Девы приял еси.

Умерщвление подъял еси мене ради, и душу смерти предал еси, Иже вдохновением божественным душу ми вложивый, и отрешив вечных уз, и совоскресив нетлением прославил еси.

Богородичен: Радуйся, благодати источнице, радуйся лестнице, и двери небесная, радуйся свещнице, и ручко золотая, и горо несекомая, Яже Жизнодавца Христа мируи рождшая.

Ин канон Пресвятей Богородице

Кую Ти достойную песнь наше принесет неможение точию обрадовательную, ейже нас Гавриил тайно научил есть: радуйся, Богородице Дево, Мати Невестная.

Приснодеве и Матери Царя вышних сил, от чистейша сердца, вернии, духовне возопиим: радуйся, Богородице Дево, Мати Невестная.

Ин канон Триоди

Оставил мя еси богатству сластей, веселящемуся на всяк день в сладости богатому. Темже Тя молю Спасе, огня мя якоже Лазаря избави.

Одеяхся Спасе сластями, якоже обложивый себе виссон и золото, и золотую одежду: но мя во огонь якоже онаго, да не послещи.

Веселяшеся богатством и сладостию богатый, древле в житии тленном: темже на муки осудися, нищий орошашеся Лазарь.

Богородичен: Чини Тя ангел и человек, безвестная Мати, хвалят непрестанно: Творца бо сих якоже младенца во объятиих Твоих носила еси.

Ин канон преподобной

Любовию светоносную и Божественную твою память празднующему, свет низпосли ми, предстоящая преподобная свету неприступному Христу, искушений всяческих мя жития избавляющи.

К египтяном плотию отшедый, неописанный и превечный, из Египта показывает всесветлую тя звезду, ведый Господь вся прежде бытия.

Божественных заповедей честная не ведущи, Божественный образ Божий окаляла еси: Божественным же промыслом паки очистила еси всехвальная, обожившиися деяньми Божественными преподобная твоими.

Богородичен: О Твоего Боже мой многого благоутробия, и неизреченнаго Твоего снисхождения! Како первее блудницу, Матере Твоея мольбами, яко Чистую и Непорочную, ангелом уподобил еси.

Катавасиа: Отверзу уста моя, и наполнятся Духа, и слово отрыгну царице Матери, и явлюся светло торжествуя, и воспою радуясь тоя чудеса.

Песнь 3

Ирмос: Едине ведый человеческого существа немощь и милостивно в не воображся, препояши мя с высоты силою, еже вопити Тебе, Святыи, одушевленный храм неизреченныя славы Твоея, Человеколюбче.

Бог Сый мне, Блаже, падшаго ущедрил еси, и снити ко мне благоволив, вознесл мя еси распятием, еже вопити Тебе, Святыи: Храме одушевленный неизреченныя Твоея славы, Человеколюбче.

Живот ипостасный Христе сый, в истлевша мя, яко Милосердый Бог, оболкся, в персть смертную сошед, Владыко, смертную державу разрушил еси, и мертв тридневен воскрес, в нетление мя облекл еси.

Богородичен: Бога заченши во чреве, Дево, Духом Пресвятым, пребыла еси неопалима, понеже Тя купина законоположнику Моисею, палимую нежегомо, яве предвозвести, огонь нестерпимый приемшую.

Ин

Облак Тя легкий неложно, Дево, именуем, пророческим возследующе речением: прииде бо на Тебе Господь низложити египетския прелести рукотворения, и просветити сим служащия.

Тя запечатанныи воистинну лик пророческий источник, и заключенную дверь именована, девства Твоего, Всепетая, явственне знамения нам пишуще: еже сохранила еси и по рождестве.

Ин

Лазаря якоже спасл еси от пламене Христе, тако мене от огня избави геенскаго, недостойнаго раба Твоего.

Богатый страстьми, и сластьми есмь, Господи, Лазарь же убогий лишением добродетелей, но спаси мя.

В червленицу и виссон облачашеся богатый, сластьми и грехами, сего ради пламенствуется.

Богородичен: Дажь нам помощь, молитвами Твоими Всечистая, прилоги отражающи лютых обстояний.

Ин

Ко вратом погибели приближшуюся деяньми безместными, врата прежде адава сокрушивый силою Божества, врата покаяния тебе отверзает всечестная, дверь Сый сам живота.

Оружие греха долготерпеливе прежде бывшую, оружию Креста Божественнаго поклонением показал еси, оружия бесов вся, и козни всяко побеждающую, благоутробне.

Цену за всех, свою прежде измявый кровь, банею слез чистую ты соделоваешь, проказою лютою болевшую злейшаго деяния, всяко еже быти всем давый.

Богородичен: Слова всякаго есть вышшее, еже на Тебе Дево: Слово бо Отчее в Тебе Боголепно вселися, разрешение согрешений всем согрешающим, словом едином подаваяи.

Катавасиа: Твоя песнословцы Богородице, живый и независтный источниче, лик себе совокупльшия, Духовно утверди, в Божественней Твоей славе венцев славы сподоби.

Малая ектения.

Паки и паки миром Господу помолимся...

Взыграния вся плотская обуздавши труды постническими, мужественное явила еси души твоея мудрование. Крест бо Господень видети возжелавши, самую себе всечестная мирови распяла еси: отнюдуже и к желанию ангельскаго жительства любезно управила еси себе всеблаженная. Моли Христа Бога, оставление согрешений даровати, чтущим любовь святую память твою.

Слава И ныне, Богородичен:

Небесная врата и ковчег, всесвятую гору, светозарный облак воспоим, неопалимую купину, словесный рай, Евино воззвание, вселенная всея великое сокровище: яко спасение в ней содеся мирови, и оставление древних согрешений. тем и вопием ей: молися Сыну Твоему и Богу, согрешений оставление даровати, благочестно покланяющимся Всесвятому Рождеству Твоему.

Песнь 4

Ирмос: Гору Тя благодатию Божиею приосененную, прозорливыма Аввакум усмотрив очима, из Тебе изыти Израилеву провозглашаше Святому, во Спасение наше и обновление.

Кто сей Спас иже из Едома исходя, венец нося терновен, очервленну ризу имый, на древе вися; Израилев есть Сей Святой, во Спасение наше и обновление.

Видите людие непокоривии, и устыдитесь: Егоже бо яко злодея вы вознести на крест у Пилата испросисте умовредне, смерти разрушив силу, боголепно воскрес из гроба.

Богородичен: Древо Тя, Дево, жизни вемы: не бо снеди плод смертоносный человеком из Тебе прозябе, но живота присносущнаго наслаждение, во Спасение нас поющих Тя.

Ин

Слыши чудес небо, и внушай земле, яко Дщи перстнаго убо падшаго Адама, Богу наречена бысть, и Своему Содетелю Родительница, на Спасение наше и обновление.

Поем великое и страшное Твое таинство, премирных бо утаився чиноначалий, на Тя Иже сый сниде яко дождь на руно, Всепетая, на Спасение нас поющих Тя.

Ин

Наслаждашеся богатый брашном, и одеяньми веселяся: Лазарь же насытитися желаше сего трапезы крупиц.

Psi убо облизоваху языком нищаго Лазаря струпы, сострадательнейшее бывающе, богатаго разума ко убогому.

Пред враты валяшеся древле богатаго, Спасе, Лазарь мучимь язвами убожества, отонудуже ныне прославляется.

Богородичен: Егоже родила еси Пречистая, моли спастися воспевающим Тя, от работы льстиваго, яко Едина еси нам Предстательница.

Ин

Яко Содетель человеческого естества, яко милости источник, и благоутробия богатство, ущедрил еси Человеколюбче прибегницу Твою, и исхитил еси сию губительнаго зверя.

Крест видети потщавшися, Крестным просвещением Марие озарилася еси, Крестом беседовавшаго, манием Божественным распеншися мирови досточудная.

Злых вина первее, сласть лукавая, многим бывши, аки солнце просиявши, всем наставница преподобная явися согрешающим.

Богородичен: Ум превозшла еси и Небесный, мысленное Небо всех Царя: законов бо естества вне Чистая Законодателя и Создателя всех родила еси.

Катавасиа: Седяй в славе, на престоле Божства, во облаце легце, прииде Иисус Пребожественный нетленною дланию, и спасе зовущия: слава Христе силе Твоей.

Песнь 5

Ирмос: Просветивый сиянием пришествия Твоего, Христе, и осветивый Крестом Твоим мира концы, сердца просвети светом Твоего Богоразумия, православно поющих Тя.

Пастыря овцам великаго и Господа, иудеи древом крестным умертвиша: но Той яко овцы, мертвыя, во аде погребенныя, державы смертныя избави.

Крестом Твоим мир благовестив, и проповедав пленным, Спасе мой, оставление, державу имущаго посрамил еси, Христе: нага, обнищавша показавый Божественным востанием Твоим.

Богородичен: Прощения верно просящих, Всепетая, не презри: но приими, и сия доношай Сыну Твоему, Пречистая, Богу Единому Благодетелю, Тебе бо Предстательницу стяжахом.

Ин

Веселятся небесныя силы зряще Тя: радуются с ними человеков собрания: Рождеством бо Твоим совокупишася, Дево Богородице, еже достойно славим.

Да движатся вси языцы человечестии и мысли, к похвале человеческого во истинну удобрения, Дева предстоит яве славящи, верою Тоя поющих чудеса.

Ин

На Авраамлих недрах, Лазаря богатый егда узре, во свете и славе веселящаяся, Отче, взываше, Аврааме, помилуй мя во огни осужденнаго, и языком люте пламенуема.

Насладился еси богатством жития веселяся, Авраам глаголаше богатому, отнюдуже мучишися zde вечно во огни сый, нищии же в веселии нескончаемом радуется Лазарь.

Жития прелестию богатый бых, якоже богатый житие все сластями иждивый, Человеколюбче: но молю Твоих щедрот, еже свободити ми ся огня, якоже спасеся Лазарь.

Богородичен: Матернее дерзновение к Сыну стяжавши Всечистая, сроднаго промышления о нас не презри, молимся: яко Тя и Едину, христиане ко Владыце, умилоствление благоприятное предлагаем.

Ин

Моисей прославися иногда на Синаи, Божия задняя таинственно видево преславный, подписуя странное таинство: манноприемлющия же стамны ныне, образу Пречистому тепле припадши, Мариа ангельское житие носит.

Храм благолепия Твоего вожделевши псаломски видети, умное же селение славы Твоея, Твой храм осквернившая: умными молитвами Христе, Твоего храма Неискусомужныя бывшия, храм мя вседетельнаго сотвори Духа.

Удою плоти, очесы многих уловившая, сластию краткою, снедь же диаволу сих сотворшая, уловлена бысть всеистинно Божественною благодатию Креста честнаго сладчайшая Христови снедь бывши.

Богородичен: Научен лик пророческий таинству еже в Тебе, таинственными Богоглаголаньми Пречистая, Тебе многообразно предглагола: манноприемлющия же стамны ныне, образу Пречистому сия припадши, Мариа споручница грешных к Богу.

Катавасиа: Ужасошася всяческая о Божественной славе Твоей: ты бо неискусобрачная Дево, имела еси во утробе над всеми Бога, и родила еси безлетнаго Сына, всем воспевающим Тя мир подавающая.

Ирмос: Обыде нас последняя бездна, несть избавляяй, вменихомся, яко овцы заколения, спаси люди Твоя, Боже наш, Ты бо крепость немощствующих и исправление. мя.

Согрешением первозданного, Господи, люте уязвихомся, раною же исцелихомся Твоею, еюже за ны уязвился еси, Христе: Ты бо крепость немощствующих и исправление.

Возвел ны еси из ада, Господи, кита убив всеядца, Всесильне, Твоею державою низложив того силу: Ты бо Живот, и Свет еси, и Воскресение.

Богородичен: Веселятся о Тебе, Дево Пречистая, рода нашего праотцы, Едем восприемше Тобою, егоже преступлением погубиша: Ты бо, Чистая, и прежде Рождества, и по Рождестве еси.

Ин

Предстоят раболепне Рождеству Твоему чини небеснии, дивящесе достойно Твоему безсеменному Рождеству, Приснодево: Ты бо, Чистая, и прежде Рождества, и по Рождестве еси.

Воплотися прежде сый Безплотен, Слово из Тебе, Пречистая, всяческая волею творяй, безтелесных воинства приведый от небытия, яко Всесилен.

Ин

Богатый себе пламеню огненному осуди сладным житием: убогий же Лазарь нищету избрав в сем житии, сподобися нескончаемая радости.

В недрах авраамлих Лазарь сподобися, вечнаго живота наслаждаяся: огню же богатый душою и телом осудися мучася.

Осужден есть во огонь богатый Лазаря ради: не осуди мене окаяннаго, молюся Человеколюбче Господи, но яко Лазаря, света мя Твоего сподоби.

Богородичен: Да избавимся лютых прегрешений молитвами Твоими БогоМати Чистая, и да получим Божественное просвещение, из Тебе несказанно воплощагося Сына Божия.

Ин

Радуются, Марие, ангельская воинства, равное преподобная житие сим в тебе зряще, и славу Господеви зовут.

Ужасаются бесов мрачных состояния, терпеливаго твоя крепости, яко жена преславно, и нагая, и единая сим возмогла еси.

Просияла еси аки солнце Марие всехвальная, и пустыню чудеса всю просветила еси. Темже и мене светом уясни.

Богородичен: Ангели, просветившесе славою рождества Твоего, на земли мир всем нам, и благоволение человеком, Дево, возопиша.

Катавасиа: Божественное сие и всечестное совершающе празднество Богомудрии Богоматере, приидите руками восплешим, от Нея рождшагося Бога славим.

Малая ектения.

Паки и паки миром Господу помолимся...

Кондак преподобной, глас 3

Блудами первее преисполнена всяческими, Христова невеста днесь покаянием явися, ангельское жителство подражаючи, демоны Креста оружием погубляет. Сего ради Царствия невеста явилася еси Марие преславная.

Икос:

Агницу Христову и дщерь песньми восхвалим ныне, Марию приснопамятную, явльшуюся египетское овча: и прелести сих всея избеже, и единая принесесе Церкви совершенное возвращение, воздержанием и молитвою подвизающися паче меры человеческого естества. Темже и возвыси ея и житие и деяние, Един Вседержитель, Марии преславная.

Ирмос: Тебе умную, Богородице, пещь разсмотрим, вернии, якоже бо отроки спасе три Превозносимый, мир обнови, во чреве Твоем всецел, хвальный отцев Бог и препрославлен.

Убояся земля, сокрыся солнце, и померче свет, раздрася церковная божественная завеса, камение же разседеса: на кресте бо висит Праведный, Хвальный отцев Бог, и препрославлен.

Ты быв аки безпомощен, и уязвен в мертвых волею нас ради превозносимый, вся свободил еси, и державною рукою совоскресил еси, хвальный отцев Бог, и препрославлен.

Богородичен: Радуйся, источнице присноживыя воды. Радуйся, раю пищный. Радуйся, стено верных. Радуйся, Неискусобрачная. Радуйся, всемирная Радосте, Еюже нам возсия Хвальный отцев Бог, и препрославлен.

Ин

Тя, Богородице, лествицу Иаков пророчески разумевае: Тобою бо Превозносимый на земли явися, и с человеки поживе, яко благоволи, Хвальный отцев Бог и Препрославлен.

Радуйся, Чистая, из Тебе пройде Пастырь, Иже во Адамову кожу оболкса во истинну Превозносимый, во всего мя человека, за благоутробие непостижное: Хвальный отцев Бог и Препрославлен.

Ин

Иов якоже древле во гноищи червей и кале лежаше, такоже и пред враты богатаго Лазарь седяше, вопия: Отец Боже благословен еси.

Валяся пред враты немилосердаго богатаго древле Лазарь, крупиц желаше его трапезы, но никтоже даяше ему: и вместо сих обрете Авраамля недра.

Немилосердаго богатаго части, Христе мой избави мя, молюся, и убогому Лазарю счинив мя, вопити Тебе благодарно сподоби: Отец наших Боже благословен еси.

Богородичен: Из утробы девственныя воплотивыйся, явился еси на спасение наше. Темже Твою Матерь ведуще Богородицу, благодарно зовем: Отец наших Боже благословен еси.

Ин

Превеликий во отцех, обхожда пустыню, Зосима мудрый, преподобную видети сподобися: благословен еси, зовет же, Боже Отец наших.

Что отче, странное всякия добродетели детельныя, видети пришел еси женище преподобная вопияше старцу: благословен еси, зовет же, Боже Отец наших.

Умертвивши блаженная страстей твоих взыгrania, к безстрастия ныне устремилася еси пристанищу, зовущи: благословен еси Господи Боже Отец наших.

Богородичен: Зачала еси неизреченно, Дева пребывши Пречистая, и родила еси миру Спасение, Христа Бога нашего: темже Тя вси песньми вернии величаем.

Катавасиа: Не послужиша твари Богомудрии паче создаваго, но огненное прещение мужески поправше, радовахуся поюще: препетый Отцев Господь и Бог благословен еси.

Песнь 8

Ирмос: В пещи отроцы Израилевы, якоже в горниле, добротою благочестия чистее злата блещахуся, глаголюще: благословите, вся дела Господня, Господа, пойте и превозносите во вся веки.

Иже волею вся творяй, и претворяяй, обращаай сень смертную в вечную жизнь, страстию Твоею, Слове Божий, Тебе непрестанно вся дела Господня, Господа поим, и превозносим во вся веки.

Ты разорил еси сокрушение, Христе, и окаянство, во вратех и твердынях адových, воскрес из гроба тридневен. Тебе непрестанно вся дела, яко Господа, поют, и превозносят во вся веки.

Богородичен: Яже без семени и преестественно от облистания Божественного Рождшую бисера многоценнаго Христа, воспоим глаголюще: благословите вся дела Господня, Господа, пойте и превозносите Его во вся веки.

Ин

Чертог световидный, из негоже всех Владыка, яко Жених произыде Христос, воспоим вси вопиюще: вся дела Господня, Господа пойте, и превозносите во вся веки.

Радуйся, Престоле славный Божий, радуйся, верных стено, Еюже сущим во тьме возсия свет Христос, Тебе блажащим, и вопиющим: вся дела Господня, Господа пойте, и превозносите во вся веки.

Ин

Во одежду багрянную и виссон, и порфиру богатый древле облачашеся светло окаянный: убогий же Лазарь во вратех сего люте лежаше, крупниц падающих трапезы хотя насытитися, и никтоже подаяше ему: темже в славе Христу сцарствует.

Во вратех лежаше богатаго Лазарь, согнив телом ранами, и хотяше насыщаться снеди, и никтоже даяше ему: но и пси сострадательно языком облизоваху гной и струпы его. Темже в раи сладости сподобися.

В сластех обогатех, якоже древле богатый, облачаяся на всяк день в багряницу: и аз многомилостиве, в сладости жития сего себе осуждаю, сластями и прелестями. темже молюся Тебе, от огня избавитися Христе вечнаго, во вся веки.

Троицен: Трисветлое Божество, единственную сияющую зарю, от Единого Триипостаснаго естества, родителя безначальна, единоестественна же слова Отцу, и сцарствующа единосушна Духа, дети благословите, священницы воспойте, людие превозносите во вся веки.

Ин

Глубины сердца испытуяй, прежде бытия предведый вся наша, нужнаго жития исхитил еси прибегшую к Тебе Спасе, нужно Твоему человеколюбию вопиющую немолчно: священницы благословите, людие превозносите во вся веки.

О изменения честнаго, к лучшему преложения твоего честная! О Любве Божественная, возненавидевшая плотския сласти! О веры горящая и Божественная, всехвальная Марие! Юже верно хвалим, и превозносим во веки.

Обрела еси болезней возмездие, и трудов твоих воздаяние честная Марие, имиже низложила еси убийцу врага: и ныне со ангелы зовещи, песнь немолчно вопиющи, и превозносящи Христа во веки.

Богородичен: Всего обнови мя благости ради, во утробе Твоей Чистая, не растлив обоюго естества свойств, яко всех веков Владыка: отнюдуже Тя, яко вину нашего спасения, песнями поем во вся веки.

Хвалим, благословим, покланяемся Господеви, поюще и превозносяще во вся веки.

Катавасиа: Отроки благочестивыя в печи, рождество Богородичо спасло есть. Тогда убо образуемое, ныне же действующее, вселенную всю воздвизает пети Тебе: Господа пойте дела, и превозносите его во вся веки.

Богородицу и Матерь Света в песнях возвеличим!

Песнь 9

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своя, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатящихся отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

Ирмос: Образ чистаго рожества Твоего, огнепалимая купина показа неопальная; и ныне на нас напастей свирепеющую угасити, молимся, пещь, да Тя, Богородице, непрестанно величаем.

О како, людие беззаконнии и непокоривии, лукавая совещавше, гордаго и нечестиваго оправдиша: Праведнаго же на древе осудиша Господа славы, Егоже достойно величаем!

Спасе Агнче Непорочне, Иже мира грехи возьмый, Тебе славим воскресшаго тридневно, со Отцем и Божественным Твоим Духом, и Господа славы: Егоже богословяще, величаем.

Богородичен: Спаси люди Твоя, Господи, ихже стяжал еси честною Твоею кровию, церквам Твоим подавая мир, Человеколюбче, Богородицы молитвами.

Ин

Из корене Давидова прозябла еси пророческаго, Дево, и богоотческаго: но и Давида яко воистинну Ты прославила еси, яко рождши пророчествованнаго Господа славы: Егоже достойно величаем.

Всяк похвальный, Пречистая, закон побеждается величеством славы Твоея. Но о, Владычице, от раб Твоих недостойных, от любви Тебе приносимое прими, Богородице, со усердием пение похвальное.

Ин

Убогаго мя Лазаря Христе, молюся, соделай, сластей возжеления моя потребляя, яко естеством Бог: добродетельми же мя богата сотвори, да верою в песнопениях величаю Тя.

Богатый и немилосердый, ум мой презрех, верою Твоих заповедей Человеколюбче, пред враты повержен лют: но яко сострадательн и любощедр возстави, якоже древле четверодневнаго друга Лазаря.

Вси извыкохом притче Владычней, вси убо вернии возненавидим богатаго немилосердное, да муки избегнем, и в недрах Авраамлих присно ликуим.

Богородичен: Тя невидимаго Бога носившую объятии, на Небесех певаемаго от всякия твари, и Тобою нам дарующаго всегда спасение, в вере величаем.

Ин

Удобь претерпела еси, мати, пустынный труд, укрепляема державною силою Христовою: скверная бо помышления находящая, струями Божественных слез угасила еси чистая, постников высота, преподобных похвало.

Пресветлейшими лучами, просвещает тя едина свет рождшая Христа, Дева и Чистая: страшную врагом тя поставляет Честная: явственную же всем Марие являет тя, страдалец красото, преподобных утверждение.

Оставивши мудренно земная вся, жилище честное Духа явилася еси: мирских убо лютых свободитися, моли единаго Христа Свободителя, верно совершающим Божественную память твою.

Богородичен: Законов естества Дево, паче естества утаившися, новое Отроча на земли родила еси Чистая, Законодавца Суца и Ветха Деньми, мысленное Небо всех Творца: тем верою и любовию Тя ублажаем.

Катавасиа: Всяк земнородный да възиграется Духом просвещаемь, да торжествует же безплотных умов естество, почитающее священное торжество БогоМатере, и да вопиет: радуйся Всеблаженная Богородице, чистая присно Дево.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 9-й

Заключенным Владыко дверем, яко вшел еси, Апостолы исполнил еси Духа Пресвятаго, мирно дунув, имже вязати же и решати грехи рекл еси: и по осми днех Твоя ребра Фоме показал еси, и руце. С нимже вопием: Господь и Бог Ты еси.

Слава, Светилен преподобной

Образ покаяния тебе имуще всепреподобная Марие, Христа моли, во времени поста, сему нам дароватися, яко да в вере и любви, тя песньми восхвалим.

И ныне, Богородичен:

Сладосте ангелов, скорбящих радости, Христиан предстательнице, Дево Мати Господня, заступи нас, и избави вечных мук.

псалом 150-й

Глас 1. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):

На хвалитех стихиры воскресны, глас 6:

Хвалите Господа с небес, хвалите Его в вышних. Тебе подобает песнь Богу. Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Поем Твою, Христе, спасительную страсть, и славим Твое Воскресение.

Стих: Хвалите Бога во святых Его, хвалите Его во утверждении силы Его.

Крест претерпевый, и смерть упразднивый, и воскресый из мертвых, умири нашу жизнь, Господи, яко един Всесилен.

Стих: Хвалите Его на силах Его, хвалите Его по множеству величества Его.

Ада пленивый, и человека воскресивый, Воскресением Твоим, Христе, сподоби нас чистым сердцем Тебе пети и славити.

Стих: Хвалите Его во гласе трубнем, хвалите Его во псалтири и гуслех.

Боголепное Твое снисхождение славяще, поем Тя, Христе. Родился еси от Девы, и не разлучен был еси от Отца, пострадал еси, яко человек, и волею претерпел еси Крест, воскресл еси от гроба, яко от чертога произшед, да спасеши мир, Господи слава Тебе.

Стих: Хвалите Его в тимпане и лице, хвалите Его во струнах и органе.

Егда пригвоздился еси на древе крестнем, тогда умертвися держава вражия: тварь поколебася страхом Твоим: и ад пленен бысть державою Твоею: мертвыя от гроб воскресил еси, и разбойнику рай отверзл еси: Христе Боже наш, слава Тебе.

Стих: Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.

Рыдающа со тщанием гроба Твоего дошедша честныя жены, обретша же гроб отверст, и уведевша от Ангела новое и преславное чудо, возвестиша апостолом: яко воскресе Господь, даруй миру велию милость.

Стих: Воскресни Господи Боже мой, да вознесется рука Твоя, не забуди убогих Твоих до конца.

Страстей Твоих Божественным язвам поклоняемся, Христе Боже, и еже в Сионе Владычному священнодействию, на конец веков богоявленне бывшему: ибо во тьме спящия, Солнце просвети правды, к невечернему наставляя сиянию: Господи, слава Тебе.

Стих: Исповемся Тебе Господи, всем сердцем моим, повем вся чудеса Твоя.

Любомятежный роде еврейский, внушите, где суть, иже к Пилату пришедши: да рекут стрегущии воины: где суть печати гробныя; где преложен бысть Погре-

бенный; где продан бысть Непроданный; како украдено бысть Сокровище; что оклеветуете Спасово востание пребеззаконии иудеи Воскресе, Иже в мертвых свободу, и подает миру велию милость.

Слава, Триоди, глас 1

Несть царство Божие пища и питие: но правда и воздержание со святостию. Темже не богатии внидут в не: но елицы сокровища своя в руки нищих влагают. Сия и Давид пророк учит глаголя: праведен муж милуяй весь день, наслаждайся Господеви, и во свете ходяй не поткнется. Сия же вся к наказанию нашему пишася, яко да постыщеся благодостыню творим, и даст нам Господь вместо земных Небесная.

И ныне, глас 2

Преблагословенна еси Богородице Дево, воплощшим бо ся из Тебе ад пленися, Адам возвася, клятва потребися, Ева свободися, смерть умертвися, и мы ожихом. Тем воспевающе вопием: благословен Христос Бог благоволивый тако, слава Тебе.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемся, славословим Тя, благодарим Тя великия ради славы Твоя.

Господи Царю Небесный Боже, Отче Вседержителю, Господи Сыне Единородный, Иисусе Христе, и Святыи Душе. Господи Боже, Агнче Божий, Сыне Отець, вземляй грехи мира, помилуй нас.

Вземляй грехи мира, прими молитву нашу. Седяй одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхваляю имя Твое во веки, и в век века. Сподоби, Господи, в день сей без греха сохранитися нам!

Благословен еси, Господи Боже отец наших, и хвално и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.

Господи! к Тебе прибегах: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святыи Боже, Святыи Крепкий, Святыи Безсмертный, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святыи Безсмертный, помилуй нас. Святыи Боже, Святыи Крепкий, Святыи Безсмертный, помилуй нас!

Тропарь воскресный

Днесь Спасение миру бысть, поем Воскресшему из гроба, и Начальнику жизни нашея: разрушив бо смертию смерть, победу даде нам и велию милость.

сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

просительная ектения.

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

Аминь.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

Слава Отцу и Сыну и Святому Духу, и ныне и присно и во веки веков, аминь. Господи, помилуй, Господи, помилуй, Господи, помилуй. Благослови.

Слава Тебе, Христе Боже, Упование наше, слава Тебе!

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшего Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святого храма сего и вся православныя Христианы, Господи, сохрани их на многая лета.

На 1 часе поется кондак “Взбранной Воеводе” или празднику.